

Aningaasarsianit akileraarutit pillugit Inatsisartut inatsisaata allanngortinneqarneranik Inatsisartut inatsisaanni nr. 9, 3. december 2012-imeersumi nalikillilersuinernut maleruagassat kingullermik allanngortinnerisigut aningaasaqarnikkut kingunerisassai pillugit kingusinnerpaamik UKA2016-imut atatillugu saqqummiunneqartussamik nalunaarusiornissaannik Naalakkersuisut peqquneqarnissaannik Inatsisartut aalajangiiffigisassaattut siunnersuut. Nalunaarusiornikkut takutinneqassaaq allannguuteqarneq ingerlatsiveqarfinnut mikinerusunut akunnattumillu angissusilinnut aningaasaqarnikkut kinguneqarsimanersoq. Taamatuttaaq nalunaarusiami ingerlatseqatigiiffiit atortussanik nutaanik aningaasaliiffigisaminnillu nalikillilersuinnaanerat siunertaralugu aningaasatigut kingunerisat nalilersuinernik imaqartinneqassaaq.

(Inatsisartunut ilaasortaq, Agathe Fontain, Inuit Ataqtigiit)

Akissuteqaat

(Aningaasaqarnermut, Aatsitassanut Nunanullu Allanut Naalakkersuisoq)

Aappassaaneerneqarnera

Aningaasaqarnermut Akileraartitsisarnermullu Ataatsimiititaliap suliaanut Naalakkersuisut qujapput, ataatsimiititali allannguutissatut siunnersuutigisai tusaatissatut tigullugit. Taamaattumillu, ataatsimiititap kissaatigisaa naapertorlugu Naalakkersuisut nassuiaammik suliaqarniarput.

Allannguutissatut siunnersuut Naalakkersuisut ima paasivaat, nassuiaammik tamatumingga suliaqarnermi suliffeqarfiit naatsorsuutaannik annertuunik il.il. ukiuni arlalinneersunit nammineerluni misissuisoqartariaqanngitsoq, naleqq. siullermeerneqarnerani akissuteqaammut Naalakkersuisut nassuiaataat. Naalakkersuisut naammagisimaarpaat, Ataatsimiititaliap allannguutissatut siunnersuummini pissutsit taakkua sillimaffigimmatigit, aammalu Naalakkersuisut, Ataatsimiititaliap kissaataa naapertorlugu, nalikilliliinermut malittarisassanik allannguineranik kingullernik nalinginnaanerusumik annertunerusumik, suliffeqarfiit mikisut akunnattullu eqqarsaatiginerullugit nalilersuisoqarnissaanut, suliaqartoqassaaq.